

Broj: 02-02-1-03-6/25

Datum: 07.05.2025. godine

BOSNA I HERCEGOVINA
FEDERACIJA BOSNE I HERCEGOVINE
GRADSKO VIJEĆE GRADA GRAČANICA

**Ulica Mula Mustafe Bašeskije 1
75 320 Gračanica**

N/r Mirza Okić, predsjedavajući Gradskog vijeća

PREDMET: Preporuka, dostavlja se

Poštovani,

Gender Centar Federacije Bosne i Hercegovine (u daljem tekstu: Gender Centar) zaprimio je dana 18.03.2025. godine Zahtjev za ispitivanje povreda Zakona o ravnopravnosti spolova u BiH kojeg je podnio sekretar Gradskog odbora Naše stranke Gračanica, Muharem Musić (u daljem tekstu: podnosilac). Podnosilac se u zahtjevu žali da na nepoštivanje člana 20.¹ Zakona o ravnopravnosti spolova u BiH („Službeni glasnik BiH“, broj 32/10 – prečišćeni tekst), te člana 32. stav (3)² i člana 69. stav (4)³ Statuta Grada Gračanica („Službeni glasnik Grada Gračanica“, br. 1/23), navodeći da u postupku imenovanja članova stalnih radnih tijela Gradskog vijeća Grada Gračanica i članova vijeća mjesnih zajednica sa područja Grada Gračanica nije ispoštovan princip ravnopravnosti spolova, odnosno zakonski minimum od 40% predstavnika manje zastupljenog spola. Podnosilac je u prilogu dostavio izvode iz Službenog glasnika Grada Gračanica br. 01/25 i 03/25 gdje su objavljena rješenja o imenovanju stalnih radnih tijela Gradskog vijeća Gračanica u kojima nije ispoštovan princip ravnopravne zastupljenosti spolova i to: Komisija za propise i Statut, izbor i imenovanje, gradska priznanja i obilježavanje značajnih događaja i ličnosti, Komisija za etički kodeks, Komisija za ravnopravnost spolova, predstavke i pritužbe, prava i slobode čovjeka, Komisija za budžet, Komisija za urbanizam i ekologiju i Komisija za poljoprivredu i odluke o imenovanju vijeća mjesnih zajednica u kojima nije ispoštovan princip ravnopravne

¹ „Član 20.

(1) Državna tijela na svim nivoima organizacije vlasti, i tijela lokalne samouprave, uključujući zakonodavnu, izvršnu i sudsku vlast, političke stranke, pravna lica s javnim ovlaštenjima, pravna lica koja su u vlasništvu ili pod kontrolom države, entiteta, kantona, grada ili općine ili nad čijim radom javni organ vrši kontrolu, osigurat će i promovirati ravnopravnu zastupljenost spolova u upravljanju, procesu odlučivanja i predstavljanju. Ova obaveza postoji i za ovlaštene predlagачe prilikom izbora predstavnika i delegacija u međunarodnim organizacijama i tijelima.

(2) Ravnopravna zastupljenost spolova postoji u slučaju kada je jedan od spolova zastupljen **najmanje u procentu 40% u tijelima iz stava (1) ovog člana.**

(3) Diskriminacijom po osnovu spola smatra se situacija kada ne postoji ravnopravna zastupljenost iz stava (2) ovog člana.

(4) Tijela iz stava (1) ovog člana u cilju ostvarivanja ravnopravne zastupljenosti spolova i otklanjanja diskriminacije dužna su donositi posebne mjere propisane članom 8. ovog Zakona.“

² „Član 32.

...(3) Gradsko vijeće će prilikom izbora i imenovanja članova radnih tijela i komisija obezbijediti spolnu zastupljenost članova radnih tijela u skladu s Zakonom o ravnopravnosti spolova.“

³ „Član 69.

...(4) Prilikom predlaganja i izbora članova vijeća mjesne zajednice, mora se voditi računa da sastav članova odražava približno nacionalnu strukturu stanovništva, te da pripadnici oba spola budu ravnopravno zastupljeni u skladu sa Zakonom o ravnopravnosti spolova.“

zastupljenosti spolova i to: VMZ Donja Lohinja, VMZ Gornja Lohinja, VMZ Gornji Doborovci, VMZ Malešići, VMZ Piskavica, VMZ Rašljeva i VMZ Soko.

Podnosilac je informirao o podnesenim sljedećim pravnim sredstvima:

-Zahtjev gradonačelniku Grada Gračanica za preispitivanje donesenih odluka o imenovanjima vijeća mjesnih zajednica i rješenja o imenovanjima stalnih radnih tijela Gradskog vijeća Gračanica, podnesen 03.03.2025. godine.

-Žalba na rješenja o imenovanju stalnih radnih tijela Gradskog vijeća Gračanica usvojenih na sjednici Gradskog vijeća održanoj 27.02.2025. godine, a podnesena 13.03.2025.godine Drugostepenom organu za žalbe Gradskog vijeća Gračanica.

-Žalba na odluke o imenovanju vijeća mjesnih zajednica Grada Gračanica usvojenih na sjednici Gradskog vijeća održanoj 27.02.2025. godine, a podnesena 13.03.2025.godine Drugostepenom organu za žalbe Gradskog vijeća Gračanica.

Podnosilac u Zahtjevu traži da se naloži Gradskom vijeću poništenje rješenja o imenovanju navedenih stalnih radnih tijela Gradskog vijeća Grada Gračanica i odluka o imenovanju navedenih vijeća mjesnih zajednica, te da se ponovi postupak predlaganja i donošenja novih rješenja i odluka koje će biti u skladu s odredbama Statuta Grada Gračanica i Zakona o ravnopravnosti spolova u BiH.

U skladu sa članom 19. stav (1) Jedinistvenih pravila za primanje i obrađivanje zahtjeva za ispitivanje povreda Zakona o ravnopravnosti spolova u BiH („Službeni glasnik BiH“, broj 72/12 – u daljem tekstu: Jedinistvena pravila), Gender Centar je zatražio od predsjedavajućeg Gradskog vijeća Gračanica izjašnjenje na navode iz zahtjeva podnosioca, ujedno je zatražena informacija o postupku pred Drugostepenim organom za žalbe Gradskog vijeća Grada Gračanica povodom žalbe na rješenja o imenovanju stalnih radnih tijela Gradskog vijeća Grada Gračanica i žalbe na odluke o imenovanju vijeća mjesnih zajednica Grada Gračanica koje su podnesene 13.03.2025.godine, te je zatražen i Poslovnik o radu Gradskog vijeća Grada Gračanica.

U izjašnjenju predsjedavajućeg Gradskog vijeća Grada Gračanica, Mirze Okića koje je zaprimljeno 14.04.2025. godine je navedeno sljedeće:

„...Gradsko vijeće Grada Gračanica je na 5. sjednici 27.02.2025. godine na prijedlog političkih subjekata a na osnovu rezultata na posljednjim Lokalnim izborima održanim 2024. godine izvršilo imenovanje ukupno 23 vijeća mjesnih zajednica sa područja Grada Gračanica. Prilikom imenovanja vodilo se računa o spolnoj zastupljenosti te je od ukupnog broja vijećnika u vijećima MZ-a imenovano 37,21% žena s tim da treba napomenuti da u Vijeće MZ Malešići nije imenovano šest vijećnika, u Vijeću MZ Gornja Orahovica nije imenovan jedan vijećnik i u Vijeće MZ Lendići nije imenovan jedan vijećnik. U planu je da se za nedostajuće članove vijeća MZ-a imenuju žene kako bi bila ispunjena zakonska odredba od 40%. Na istoj sjednici od 27.02.2025. godine također na osnovu prijedloga političkih subjekata izvršeno je i imenovanje u sedam stalnih radnih tijela Gradskog vijeća odnosno komisija dok je jedna komisija imenovana na 3. sjednici održanoj 30.12.2024. godine. Ukupno je u stalna radna tijela Gradskog vijeća imenovan 41 član od toga je 16 žena odnosno 39,02%. Prema članu 29. Poslovnika o radu Gradskog vijeća Gračanica stalna radna tijela Gradskog vijeća imenuju se prema stranačkom sastavu Gradskog vijeća, tako da odražavaju stranačku zastupljenost Gradskog vijeća. Prilikom predlaganja kandidata za članove stalnih radnih tijela politički subjekt će posebno voditi računa o stručnosti kandidata, pripadnosti manje zastupljenom spolu, kao i marginaliziranim grupama iz čega proizilazi da je teret poštivanja zakonskih normi o ravnopravnosti spolova na predlagачu a ne na samom Gradskom vijeću.

Po pitanju podnesenih žalbi na rješenja o imenovanju stalnih radnih tijela Gradskog vijeća Gračanica i po žalbi na odluke o imenovanju vijeća MZ-a Grada Gračanica podnosilac žalbe je obavješten da na osnovu člana 222. stav (5) Zakona o upravnom postupku, protiv odluka i rješenja domova Parlamenta FBiH, skupština kantona, odnosno gradskog i općinskog vijeća, kao i rješenja Vlade Federacije Bosne i Hercegovine i vlade kantona ne može se izjaviti žalba, odnosno žalba nije dopuštena. Protiv navedenih odluka može se pokrenuti upravni spor pred nadležnim sudom, dakle ove odluke mogu biti predmet sudske kontrole ali ne kroz klasičan žalbeni postupak. Član 115. Statuta Grada Gračanica („Službeni glasnik Grada Gračanica“, br. 1/23) na koji se podnosilac pozvao u žalbi, uređuje pravo žalbe protiv akata koji su doneseni na osnovu odluka i propisa Gradskog vijeća i Gradonačelnika i ne odnosi se na žalbu protiv normativnih akata Gradskog vijeća.“

U skladu sa članom 19. stav (3) Jedinostvenih pravila zatražen je odgovor podnosioca zahtjeva na navode iz izjašnjenja predsjedavajućeg Gradskog vijeća Grada Gračanica. U odgovoru koji je zaprimljen 06.05.2025. godine navedeno je sljedeće:

„1....Statut Grada Gračanica i Zakon o ravnopravnosti spolova u BiH su na ovu temu potpuno jasni. Izričito se zahtjeva da u svako vijeće mjesne zajednice, **ovlašteni predlagači**, a to su u ovom slučaju političke stranke, na osnovu ostvarenih izbornih rezultata u mjesnoj zajednici, moraju predložiti najmanje 40% osoba manje zastupljenog spola, od ukupnog broja mandata koje su osvojili u dotičnoj mjesnoj zajednici. Prilikom predlaganja članova u vijeća mjesnih zajednica, sve političke stranke, osim Stranke demokratske akcije, su ispoštovali navedeno načelo te su za svako vijeće mjesne zajednice za svoje mandate predlagali najmanje 40% osoba manje zastupljenog spola. U dopisu od 05.02.2025. godine, kojeg je Komisija za Statut i propise, izbor i imenovanja, gradska priznanja i obilježavanje značajnih događaja i ličnosti dostavila političkim strankama, kao ovlaštenim predlagačima članova vijeća mjesnih zajednica navedeno je sljedeće: **„Prilikom predlaganja kandidata u skladu s članom 69. Statuta dužni ste voditi računa da pripadnici oba spola budu ravnopravno zastupljeni u skladu sa Zakonom o ravnopravnosti spolova.“**

Komisija za Statut i propise, izbor i imenovanja, gradska priznanja i obilježavanje značajnih događaja i ličnosti Gradskog vijeća Gračanica je nakon obrade pristiglih prijedloga, odustala od izričite primjene Zakona o ravnopravnosti spolova u BiH, te je prijedloge Stranke demokratske akcije ugradila u prijedloge odluka o imenovanjima vijeća mjesnih zajednica, iako dostavljeni prijedlozi nisu imali najmanje 40% osoba manje zastupljenog spola i iste dostavila Gradskom vijeću na usvajanje uz prijedlog da predložene odluke budu usvojene.

Naš zahtjev, za ispitivanje povreda Zakona o ravnopravnosti spolova u BiH, ne odnosi se na ukupan broj osoba manje zastupljenog spola imenovanih u vijeća mjesnih zajednica, pošto nije riječ o usvajanju jedne odluke zbirno za sva vijeća mjesnih zajednica, nego se naš zahtjev odnosi na pojedinačne odluke za pojedina vijeća mjesnih zajednica gdje odredbe Statuta Grada Gračanica i Zakona o ravnopravnosti spolova u BiH nisu ispoštovane, i to na odluke za imenovanje vijeća u sljedećim mjesnim zajednicama: Donja Lohinja, Gornja Lohinja, Gornji Doborovci, Malešići, Piskavica, Rašljeva i Soko.

- Za VMZ Donja Lohinja – SDA od 4 kandidata predlaže jednu ženu, što je 25% i 3 muškarca što je 75%. Demokratska fronta od 2 kandidata predlaže oba muškarca.
- Za VMZ Gornja Lohinja – SDA od 2 kandidata predlaže oba muškarca.
- Za VMZ Gornji Doborovci – SDA od 4 kandidata predlaže jednu ženu, što je 25% i 3 muškarca što je 75%.
- Za VMZ Malešići – SDA od 4 kandidata predlaže jednu ženu, što je 25% i 3 muškarca što je 75%.
- Za VMZ Piskavica – SDA od 4 kandidata predlaže jednu ženu, što je 25% i 3 muškarca što je 75%.
- Za VMZ Rašljeva – SDA od 4 kandidata predlaže jednu ženu, što je 25% i 3 muškarca što je 75%.
- Za VMZ Soko – SDA od 4 kandidata predlaže jednu ženu, što je 25% i 3 muškarca što je 75%.

Iz navedenog je vidljivo sljedeće: od ukupno 23 vijeća mjesnih zajednica, u 7 vijeća mjesnih zajednica SDA nije izvršila kandidaturu u skladu sa Statutom Grada Gračanica i Zakonom o ravnopravnosti spolova u BiH, a Demokratska fronta za jedno vijeće mjesne zajednice.

U navedenih 7 vijeća mjesnih zajednica, od ukupno 26 kandidata, SDA je predložila samo 6 osoba manje zastupljenog spola što je 23%.

Prema tome, podatak od 37,21%, kojeg predsjedavajući Gradskog vijeća Gračanica navodi u svom izjašnjenju, nije nastao kao rezultat predlaganja kandidata od strane Stranke demokratske akcije, nego od strane ostalih političkih stranaka koje su, za razliku od Stranke demokratske akcije, u potpunosti ispoštovale odredbe Statuta Grada Gračanica i Zakona o ravnopravnosti spolova u BiH.

2.....Prilikom predlaganja kandidata za članstvo u stalnim radnim tijelima Gradskog vijeća Gračanica, Stranka demokratske akcije nije ispoštovala odredbe stava 3. člana 32. Statuta Grada Gračanica i Zakona o ravnopravnosti spolova u BiH. Komisija za Statut i propise, izbor i imenovanja, gradska priznanja i obilježavanje značajnih događaja i ličnosti Gradskog vijeća Gračanica je takve neispravne prijedloge od SDA, prihvatila i iste ugradila u prijedloge rješenja

za imenovanje stalnih radnih tijela Gradskog vijeća te je u svojstvu predlagača, predložila Gradskom vijeću da iste usvoji. Na taj način 5 od 7 radnih tijela nije imenovano u skladu sa Statutom Grada Gračanica i Zakonom o ravnopravnosti spolova u BiH.

- U Komisiju za etički kodeks SDA je predložila oba kandidata istog spola.
- U Komisiju za ravnopravnost spolova, predstavke i pritužbe, prava i slobode čovjeka SDA je predložila oba kandidata istog spola.
- U Komisiju za budžet SDA je predložila oba kandidata istog spola.
- U komisiju za urbanizam i ekologiju SDA je predložila oba kandidata istog spola.
- U Komisiju za poljoprivredu SDA je predložila oba kandidata istog spola.

Prema Zakonu o ravnopravnosti spolova u BiH, u svakoj od 5 navedenih komisija SDA je morala imati po jednu osobu muškog i po jednu osobu ženskog spola, što se nije desilo pošto su u navedenim komisijama predlagali po dvije osobe istog spola, a što je Komisija za Statut i propise, izbor i imenovanja, gradska priznanja i obilježavanje značajnih događaja i ličnosti prihvatila te predložila Gradskom vijeću da izvrši imenovanja predloženih komisija, što se u konačnici i desilo. U obrazloženjima predloženih rješenja za imenovanje stalnih radnih tijela, predlagač rješenja uopšte nije naveo stav 3. člana 32. Statuta Grada Gračanica kao pravni osnov, čime je svjesno izbjegao obavezu poštivanja ravnopravne spolne zastupljenosti prilikom imenovanja stalnih radnih tijela Gradskog vijeća.

Predlagač rješenja o imenovanjima stalnih radnih tijela Gradskog vijeća i Gradsko vijeće, na 5-toj sjednici Gradskog vijeća Gračanica od 27.02.2025. godine nisu uzeli u obzir stav 2. člana 1. Zaključka Gradskog vijeća Gračanica sa 3. sjednice Gradskog vijeća Gračanica od 30.12.2024. godine (Službeni glasnik Grada Gračanica broj 1. od 08.01.2025. godine), koji glasi: **„Zadužuje se Komisija za propise i Statut, izbor i imenovanja, gradska priznanja i obilježavanje značajnih događaja i ličnosti da u roku od 60 dana s ovlaštenim predlagačima usaglasi prijedloge članova radnih tijela u skladu sa članom 32. Statuta Grada Gračanica i Zakonom o ravnopravnosti spolova i dostavi rješenja o imenovanju radnih tijela Gradskom vijeću na usvajanje.“** zbog čega su u konačnici usvojena rješenja u suprotnosti sa Statutom Grada Gračanica i Zakonom o ravnopravnosti spolova.

3.....Tačno je da su u ovom slučaju predlagači imali obavezu da prilikom predlaganja kandidata za članstvo u stalnim radnim tijelima vode računa o ravnopravnoj zastupljenosti spolova, ali je takođe tačno i da je obaveza Komisije za izbor i imenovanje da prijedloge koji su u suprotnosti sa zakonom ne prihvati ta da preporuči Gradskom vijeću da iste ne usvaja zbog neusklađenosti sa zakonskim propisima. Osim toga, ako je Komisija za Statut i propise, izbor i imenovanja, gradska priznanja i obilježavanje značajnih događaja i ličnosti i predložila takva neispravna rješenja, obaveza Gradskog vijeća je da ih ne usvaja i da prilikom glasanja bude protiv usvajanja rješenja koja su u suprotnosti sa zakonom.

4.....Riječ je o **Komisiji za propise i Statut, izbor i imenovanja, gradska priznanja i obilježavanje značajnih događaja i ličnosti**, koja takođe nije imenovana na način kako to propisuju Statut Grada Gračanica i Zakon o ravnopravnosti spolova u BiH.

Naime, prilikom imenovanja kandidata za članove ove komisije, Stranka demokratske akcije je predložila oba svoja kandidata istoga spola, što je u suprotnosti sa članom 20. Zakona o ravnopravnosti spolova u BiH. Komisija za izbor i imenovanje kao privremeno radno tijelo Gradskog vijeća je prihvatila ovakav prijedlog predlagača Stranke demokratske akcije i isti ugradila u prijedlog Rješenja o imenovanju Komisije za propise i Statut, izbor i imenovanja, gradska priznanja i obilježavanja značajnih događaja i ličnosti, a što je Gradsko vijeće usvojilo na 3. sjednici 30.12.2024. godine.

5. Građski odbor Naše stranke Gračanica je 13. marta 2025. godine podnio žalbu Drugostepenom organu Gradskog vijeća Gračanica, a odgovor na našu žalbu nismo dobili ni do danas. ...Obavještenje koje smo dobili je potpisano od strane predsjedavajućeg Gradskog vijeća Gračanica, koji nije drugostepeni organ za žalbe, čak nije ni član Drugostepenog organa za žalbe. Ovo znači da Drugostepeni organ za žalbe Gradskog vijeća Gračanica nije ni razmatrao našu žalbu, pošto ju je predsjedavajući Gradskog vijeća zadržao kod sebe i uputio obavijest koju od njega niko nije tražio.

6.....Gradski odbor Naše stranke Gračanica nije podnio žalbu protiv „normativnih akata Gradskog vijeća“ (Statut Grada Gračanica, Poslovnik Gradskog vijeća), nego je žalba podnesena protiv odluka i rješenja Gradskog vijeća Gračanica, a koje su donesene na osnovu Statuta Grada Gračanica, pošto smatramo da su donesene odluke i rješenja u suprotnosti s osnovnim normativnim aktima, Statutom Grada Gračanica i Poslovnikom Gradskog vijeća Gračanica.

7.....Političke stranke nisu dostavljale po jedan prijedlog u kome su bili predloženi svi kandidati, nego su predlaganja vršena za svako vijeće mjesne zajednice i svako stalno radno tijelo pojedinačno, te je Gradsko vijeće donosilo odluke za svako vijeće mjesne zajednice pojedinačno i rješenja za svako stalno radno tijelo pojedinačno. Na ovaj način predstavljajući ukupni skor u predlaganjima i imenovanjima, predsjedavajući prikriva nepoštivanje Statuta Grada Gračanica i Zakona o ravnopravnosti spolova u BiH od strane Stranke demokratske akcije, pri čemu ne navodi ni jedan razlog zašto SDA kao predlagač, nije izvršila predlaganje na način kako su to uradili i drugi predlagači, a ne objašnjava ni zašto je Gradsko vijeće pristalo da izglasava odluke i rješenja koja su u suprotnosti sa Statutom Grada Gračanica i Zakonom o ravnopravnosti spolova u BiH.“

Uz odgovor na izjašnjenje podnosilac zahtjeva dostavio je i Dopis komisije za Statut i propise, izbor i imenovanja, gradska priznanja i obilježavanje značajnih događaja i ličnosti od 05.02.2025. godine, te Zaključak Gradskog vijeća Gračanica sa 3. sjednice Gradskog vijeća Gračanica od 30.12.2024. godine.

Gender Centar je pažljivo razmotrio navode iz zahtjeva za ispitivanje povreda Zakona o ravnopravnosti spolova u BiH, navode iz izjašnjenja predsjedavajućeg Gradskog vijeća Grada Gračanica i navode iz odgovora na izjašnjenje, te konstatuje sljedeće:

Uvidom u dopis Komisije za Statut i propise, izbor i imenovanja, gradska priznanja i obilježavanje značajnih događaja i ličnosti od 05.02.2025. godine za dostavljanje prijedloga za vijeća mjesnih zajednica vidljivo je da je traženo da se prilikom predlaganja kandidata u skladu sa članom 69. Statuta vodi računa da pripadnici oba spola budu ravnopravno zastupljeni u skladu s Zakonom o ravnopravnosti spolova.

Uvidom u Zaključak Gradskog vijeća Gračanica od 30.12.2024. godine vidljivo je da je Gradsko vijeće zadužilo Komisiju za propise i Statut, izbor i imenovanja, gradska priznanja i obilježavanja značajnih događaja i ličnosti da u roku od 60 dana s ovlaštenim predlagačima usaglasi prijedloge članova radnih tijela u skladu sa članom 32. Statuta Grada Gračanica i Zakonom o ravnopravnosti spolova i dostavi rješenja o imenovanju radnih tijela Gradskom vijeću na usvajanje.

Uvidom u sadržaj Službenog glasnika Grada Gračanica br. 01/25 i 03/25 u kojem su objavljena rješenja o imenovanju stalnih radnih tijela Gradskog vijeća Grada Gračanica (Komisija za propise i Statut, izbor i imenovanje, gradska priznanja i obilježavanje značajnih događaja i ličnosti, Komisija za etički kodeks, Komisija za ravnopravnost spolova, predstavke i pritužbe, prava i slobode čovjeka, Komisija za budžet, Komisija za urbanizam i ekologiju i Komisija za poljoprivredu) i odluke o imenovanju vijeća mjesnih zajednica (Donja Lohinja, Gornja Lohinja, Gornji Doborovci, Malešići, Piskavica, Rašljeva i Soko) konstatujemo da u sastavu navedenih stalnih radnih tijela i vijeća mjesnih zajednica nije ispoštovan princip ravnopravne zastupljenosti spolova u skladu sa članom 20. Zakona o ravnopravnosti spolova u BiH, odnosno u svakom od navedenih tijela i vijeća nije osigurana zastupljenost najmanje 40% manje zastupljenog spola.

Zakon o ravnopravnosti spolova u BiH u članu 20. propisuje obavezu ravnopravne zastupljenosti spolova u državnim tijelima na svim nivoima organizacije vlasti i tijelima lokalne samouprave, uključujući zakonodavnu, izvršnu i sudsku vlast, političke stranke, pravna lica s javnim ovlaštenjima, pravna lica koja su u vlasništvu ili pod kontrolom države, entiteta, kantona, grada ili općine ili nad čijim radom javni organ vrši kontrolu. Ravnopravna zastupljenost postoji kada je jedan od spolova zastupljen u procentu najmanje 40%.

Ista obaveza propisana je u članu 32. stav (3) i članu 69. stav (4) Statuta Grada Gračanica kojima je propisano da će se prilikom izbora i imenovanja članova radnih tijela i komisija obezbijediti spolna zastupljenost članova radnih tijela u skladu s Zakonom o ravnopravnosti spolova i prilikom predlaganja i izbora članova vijeća mjesne zajednice da se mora voditi računa da pripadnici oba spola budu ravnopravno zastupljeni u skladu sa Zakonom o ravnopravnosti spolova.

Imajući u vidu da je svako od stalnih radnih tijela formirano za posebne oblasti i uzimajući u obzir značaj pitanja koja se razmatraju pred ovim tijelima za položaj muškaraca i žena potrebno je osigurati ravnopravnu zastupljenost spolova u svakom pojedinačnom stalnom radnom tijelu, kako bi se unutar istih ravnopravno predstavljala i zastupala prava pripadnika oba spola, što je i ujedno zakonska obaveza prema članu 20. Zakona o ravnopravnosti spolova u BiH.

Kada je riječ o sastavu vijeća mjesnih zajednica kao tijela lokalne samouprave potrebno je u sastavu vijeća svake mjesne zajednice osigurati ravnopravnu zastupljenost muškog i ženskog spola u skladu sa članom 20. Zakona o ravnopravnosti spolova u BiH.


Formiranjem tijela u kojima obaveza ravnopravne zastupljenosti spolova nije ispoštovana direktno se krši član 20. Zakona o ravnopravnosti spolova u BiH čime se dovodi u pitanje zakonitost rada tih tijela, te se šalje negativna poruka u pogledu poštivanja principa ravnopravnosti spolova.

Imajući u vidu naprijed navedeno, a u skladu sa članom 27. stav (1), tačka e)⁴ Zakona o ravnopravnosti spolova u BiH i člana 23.⁵ Jedinistvenih pravila, direktor Gender Centra Federacije Bosne i Hercegovine Gradskom vijeću Grada Gračanica upućuje sljedeću:

P R E P O R U K U

1. *Da osiguraju ravnopravnu zastupljenost spolova u sastavu svakog pojedinačnog stalnog radnog tijela Gradskog vijeća Grada Gračanica u skladu sa članom 20. Zakona o ravnopravnosti spolova u BiH.*
2. *Da osiguraju ravnopravnu zastupljenost spolova u sastavu vijeća svake mjesne zajednice sa područja Grada Gračanica u skladu sa članom 20. Zakona o ravnopravnosti spolova u BiH.*
3. *Da u svim budućim imenovanjima Gradsko vijeće Grada Gračanica osigura ravnopravnu zastupljenost spolova u skladu sa članom 20. Zakona o ravnopravnosti spolova u BiH.*
4. *Da se ova preporuka razmotri na narednoj sjednici Gradskog vijeća Grada Gračanica.*
5. *Da u roku od 30 (trideset) dana od dana prijema ove Preporuke obavijeste Gender Centar Federacije Bosne i Hercegovine o načinu realizacije iste.*

Očekujemo da će Gradsko vijeće Grada Gračanica djelovati odgovorno i zakonito te dati primjer drugim institucijama u provođenju člana 20. Zakona o ravnopravnosti spolova u BiH.

Direktor

Samir Numanović

Dostavljeno:

- Predsjedavajućem Gradskog vijeća Gračanica
- Podnosiocu zahtjeva
- a/a

⁴ Gender Centar prati primjenu Zakona o ravnopravnosti spolova na nivou Federacije BiH i u tu svrhu između ostalog: “e) prima i obrađuje molbe, žalbe i predstavke osoba i grupa osoba u kojima se ukazuje na povrede nekog prava iz ovog Zakona u skladu sa Jedinistvenim pravilima iz člana 26. stav (1) tačka i); “

⁵ “Ako Agencija, Gender centar FBiH odnosno Gender centar RS-a utvrde povrede Zakona, daju preporuku odgovornoj strani iz zahtjeva s ciljem preduzimanja potrebnih mjera prema odredbama Zakona...”